



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym


tiryimym@aolima

tir yimym

TAPAK 8

PM Modi-i Sudan linük nungi
India nunger anitetsü tuyuogo

Zlatan Ibrahimovic-i Champions
League medal mangutsü akok



VOL. XX NO. 189 (ADOK 189) DIMAPUR KÜPTOKNÜ (SATURDAY) RONGCHII (APRIL) 22, 2023 ₹ 5.00

Apr 24 nungi CSRE 2022 interview tenzüksü

Dimapur, April 21, 2023

(Agencies): Nagaland Staff Selection Board (NSSB)-i April 24, 2023 nungi July 5, 2023 tashi Combined Staff Recruitment Examination 2022 indang interview maparen agitsü osang metetdaksüogo.

Naga Students' Federation (NSF) den ken o angatettepsü atema Department of Personnel & Administrative Reforms-i NSSB dang CSRE 2022 indang interview anogo asemnü atema thinena atatsü

tetuyuba agüja liasü.

NSF-i state sorkar dang Viva-Voce marks 12.5% nungi 5% ajemtsü atema takhangba agütsüba melangzüba atema kaketshirtemi NSSB office kima nung lungkak aittsü aser interview mokdangtsü teletmetba agia liasü.

CSRE 2022 ya NSSB ajanga ketdangtsüa agiba mezüngbuba tatidang lir.

NSSB indang Viva-Voce osang tejangja ya official website <http://nssb.nagaland.gov.in> nung angutsü.

Transport Department-i PwDs nem facilities magütsür

Kohima, April 21, 2023

(TYO): Nagaland Transport Department-i persons with disabilities (PwDs) atema teinyaktsü shitak meinyaker ta Nagaland State Commissioner for Persons with Disabilities (SCPD)-i metetdaksü.

Hokolbarnü SCPD Diethono Nakhro den legal advisors Khriesino Kire & Asenla Walling aser Nagaland State Disaster Forum president Vikengunu Kera-i anir par teloki Inter State Bus Terminus (ISBT) Kohima semdanga liasü.

"Onoki mapang peria dang agütsüogo anungji February 5, 2019 nü state sorkari sangdong agütsüba sülen mapa inyakba repringdangi onok aru" Diethono Nakhro-i ashi.

"Onoki sorkar office tem aser public tesemtem nung PwDs atema facility balala atema inyaktsü. State sorkari sangdong agütsüba atema pelar saka mapa kuma inyakdaksünür" ta lai ashi.

Onoki mapang lemsar tanga department tem semdanga aotsü aser Nagaland nung Rights of Persons with Disabilities Act kübok ozüngtem shitak inyaker asü masü repringdangtsü, ta laisa shisem.

"ISBT Kohima nung mapa kecha balaka meinyak. Facility maliba agi ni office telungi metetet" ta Nakhro-i ashi.

Ajisüaka, tanü Transport Department ketdangsurtem, Secretary aser Transport Commissioner nunger tesem tonga aruba aser onok mulung machibatem lemsatetba atema pelar, ta laisa ashi.

2017 küm Rights of Persons with Disabilities yangluba sülen küm pungu- June 2022 tashi nung PwDs asoshi facilities renemtsü mapang züngzüksü saka Transport Department-i ano teinyaktsü aika lir ta laisa metetdaksü.

SCPD-i report ka renemtsü aser ita 3 nungi 6 tsüngda facilities agütsütsü atema mapang züngzüksütsü, ta Nakhro-isa ashi.

Nakhro-i Transport ketdangsurtem den sensaksem dang department-i PwDs asoshi concession aser tanga facilities indang sangdong shitak agütsütsü mepishi.

Tanü Transport Joint Secretary Rozy M. Athrila, Transport Commissioner T. Elias Lotha aser Divisional Manager NST Kohima nungertem liasü.

Guwahati nung kaketshirtemi helpline ka tenzükür

Dimapur, April 21, 2023

(TYO): Guwahati nung mapa bushiba aser medical teyari nungdakba dak sendakba nung nisung aika ashikokogo ta Naga Students' Union Guwahati-i sangdong ka nung ashi.

Naga nunger aika job interviews aser medical check-up (operation cost fee, doctors appointment fee, medicine bill, brokers fee) amala ateam atema ashioksür aser NSUG-i akokba tashi item khuret koktettsü atema meranger saka nisungtem maneni ashioksür.

Nisung shingaiia medical teyari atema brokers dak temulung malemtsüla mesüra mapa atema

sen jelia magütsütsüla. NSUG-i mapa bushiba mesüra medical check-up atema nübortem yaritsü atema helpline ka lapoker aser iba ya 24x7 lapoktsü ta Tir Temsunungsang Pongen aser Tongti Tezulur Khotsozo Venuh nati sangdong ka nung metetdaksü.

NSUG Helpline:

Temsunungsang (President) : 7005858870

Khotsozo Venuh (General Secretary) : 8119836470

Vimezo Keyho (Cultural Secretary) : 7005639745

Hyulozu Semp (Information & Publicity Secretary) : 9362036151

Union MoS Dr Murugan-i Nagaland semdang



April 21, 2023 nü Dimapur Airport nung Commissioner & Secretary IPR, Maria Yanthan-i Union Minister of State for I&B and Fisheries, AH and Dairying GOI, Dr. L. Murugan pelaa agizükba angur.

Dimapur, April 21, 2023

(TYO): Hokolbarnü Union MoS for Information & Broadcasting and Fisheries, Animal Husbandry & Dairying Dr L Murugan-i anogo asemnü Nagaland semdangtsü atema aru.

Tanü Union Minister Murugan-i Dimapur Airport atongba sülen helicopter ajanga Phek district-i apusoa ao. Idakji pai central government flagship schemes mapa inyakbatem repringdangtsü.

Tanü District Planning & Development Board conference hall nung pai department balala aser Civil Society Organisations (CSO) den ajurutepa sensaksema liasü.

Idangji Dr Murugan-i Narendra Modi'er sorkar indang motto tongtipangbaji terenlok lir ta ashi.

"Sorkari Nagaland kübok Dimapur nungi Udan connectivity 8 renemogo. Prime Minister Narendra Modi-i arrtsü nung aliba yimtsüng ya tatembangba masü saka mezüngbuba yimtsüng ta ashiba ama linük nung terenlok mapa idak nungi tenzüktsüla" ta pai ashi.

"Modi'er sorkari connectivity nung temulung agütsür aser iba jagi Ministry of Information and Broadcasting ajanga BIND scheme kübok budget talila mulunga agizükogo. Iba ya North

East nung broadcasting services tajungba kümdaksütsü asoshi lir aser Centre sorkari meta talang pilar aliba tesemtem nung angati alemtsü atema DTH receiver sets lakh 8 tema alizükogo" ta Dr Murugan-isa metetdaksü.

"Northeast nung fishery sector asoshi teinyaktsü jenti lir saka tangalen nungiang ango bener arur. Lanur entrepreneurs-i ango metsütsü atema ango peria agütsütsü atema mapa inyaktsüla. Pradhan Mantri Matsya Sampada Yojana (PMMSY) indang tajanzük agia mapa inyaktsüla. Modi'er sorkar kübok tesüiba küm 9 tsüngda Fisheries nung Rs 38000 Crores tema lemzüktsüogo" ta Union Minister-isa ashi.

"Tanü RAS aser bio-flocs technology kanga tejakleni aoer aser Phek district-i fisheries nung item technology amshitsüla. Phek nung Integrated Fishery aser piggery ajanga nübortem ajanzüktsü akok. 2022-23 financial year atema PMMSY kübok mapatong 40 agizükogo" ta paisa ashi.

National Livestock Mission kübok piggery, poultry atema subsidy agütsür. Nagaland nung piggery project 3 atema senotsü agütsüogo aser fisheries atema senotsü agütsütsüba nung tetsükdaksü kecha mali anungji

aluyimertemi projects tasen agütsütsüla, ta Dr Murugan-isa ashi.

Veterinary sector tsütsü Rs 650 crore tema alangba Mobile veterinary units 4000 tashi linük tesem balala asoshi agütsüogo. Item ajanga aluyimer tonga oa veterinary services agütsü. Nagaland nema units 16 lemzüktsüogo aser iba nung Phek district nung ka densema lir, ta paisa metetdaksü.

Tanü Dr Murugan-i Phek district nung ango metsür nisung 5 nem Pradhan Mantri Matsya Sampada Yojana (PMMSY) kübok Best Fish Farmer Award agütsü. Paisa Dimapur, Peren aser Kohima nung fish projects asem lapoktsü.

Hokolbar nikingdang Union Minister-isa Phek district temeket nung aliba fishery units ana semdang aser idakji ango metsürtem den ajurutepa sensaksem.

Tanü Dr. L. Murugan-i Dimapur Airport tonga arundang Fishery and Aquatic Resources, Advisor A. Pangjung Jamir, Commissioner and Secretary IPR Maria Yanthan, Secretary Fishery department Sotsula aser PIB o Doordarshan ketdangsurtemi pa pelaa agizük.

Honibarnü Union Minister Dr. Murugan-i Phek toktsür Avakhung yimtsüngi aotsü.

CM Rio aser CM Sarma nati arrtsülen totzü bushia atsütettsü mulungtep

Guwahati, April 21, 2023

(Agencies): Assam Chief Minister Himanta Biswa Sarma aser Nagaland Chief Minister Neiphiu Rio nati mangatettep aliba arrtsülen totzü bushia atsütettsü mulungtepogo.

Assam aser Arunachal Pradesh sorkartem tsüngda arrtsü ken o angatettepsü atema tenanzüktep ka nung sign asüba sülen ghonda ishika lir Sarma aser Rio nati state anaprong rongsenketzung tsütsü ajanzüktsü atema totzü atsüa agitsü mulungtep.

Assam aser Nagaland state temi küm aika arrtsü ken o angatettepsü atema lenmangtem bushitepa arudar, ta Assam

sorkar sangdong ka nung ashi. Chief minister ana senden amendang state ana tsüngda arrtsülen totzü bushia atsütettsü atema jembitep.

"Assam aser Nagaland tsüngda ashishitep aliba tesemtem nung oil exploration atema MoU ka nung sign süttepsü lemtetogo. Totzü atsüa agitsü aser royalties ji state ana tsüngda lemsatepsü akok" ta CM Rio-isa metetdaksü.

"Iba ya renemba sülen Nagaland telunglen oil exploration mapa inyaktsü lenmang sadema lir. Asen linükia totzü kanga nungdaker" ta paisa ashi.

Brihostibarnü CM Rio-i New Delhi nung Union Minister for

Housing and Urban Affairs and Petroleum and Natural Gas, Hardeep Singh Puri den ajurutep.

Iba mapang Assam CM Sarma liasü aser pai "Assam House, New Delhi nung Nagaland Chief Minister Neiphiu Rio den ajurutepba atema pelar. Künati arrtsü ken o aser state ana dak sendakba onüktem jembitep" ta metetdaksü.

Assam aser Nagaland tsüngda kilometer 434 agi arrtsütepa lir.

Assam aser Nagaland tsüngda arrtsü ken o ya küm 60 tema lir aser aiben lendong atalokogo. Iba atema lendong tulu ka atalokbaji 1985 küm Merapani nung atalokba liasü. Iba mapang Assam police 28 dena nisung 41 taküm sama.

Kohima nung truck ka mükepök, ki aser dokan raksa



Kohima, Rongchii/April 21 (TYO): Hokulbarnü North Police Station Kohima anasa khu tali bena aliba gari ka atang leni atutsü merandang mükepoka nija ki ka aser dokan pezü raksa.

Traffic police osang ajanga ashiba agi, Medical College Kohima atema long blocks bena aliba truck ka North Police Station traffic junction leni metuteti anepdang 2:30 ako

meta mükepök.

Osang ajanga ashiba agi, gari anisangi gari ya mazüoktet aser mezüzüka aludang doka asem nensa aser lenmang nung mekepoka nikongdang tashi gari mesenzüteti nokdanga liasü.

Nisung asü-amaba osangbo mali saka sen lakh aika jenjang ki o jen raksaogo, ta osang ajanga ashir.

Iba lendong ya kechi tai ajanga atalokar ano mejangja

saka gari nung gol kar mapa meinyakba ajanga lir ta gari anisangi ashir. Iba gari anisang tongtipa jena ogo aser gari anir tanabuba police ket nung lir, ta osang ajanga ashir.

North Police Station Kohima anasa Hokulbarnü Medical College Kohima atema long bena aliba gari ka mükepoka dokan asem aser ki ka raksatsü. Iba lendong nung nisung asü-amaba osangbo mali.

Kohima nung State Level Youth Festival mungogo

Dimapur, Rongchii/April 21 (TYO): Indira Gandhi Stadium, Kohima nung April 21, 2023 nü Guitar Recital, Quiz and Essay Writing tetoktepba nung State Level Youth Festival munga liasü, kong alakteta jaoker Advisor, Youth Resources and Sports, Keoshu Yimkhiung liasü.

Advisor Keoshu-i iba sentong nung lanurtem den jembidang, sentong nung shilem agitetba ya takok lir, ta ashir.

Tetoktepba nung takok anguyonga-manguyonga shilem agiba angazükba mapang ka südaktsüsüla, kechiaser lanur aikati mela-mela kechiserna ajak nung tezü atanger aser aikati takok mesüra tamakok ajuruba sülen züpa-züyima akumer, ta pai ashir.

Merangertem asoshi tatem maka, kechiaser tajungtiba maongka asen jakdang lir, mera ajak tayongzükba tasen ka ama tajunglen nungi bendanga agüja

agizükra, iba nisungi alizüung tongtettsü, ta Keoshu Yimkhiung-i ashir.

Pai sentepa alirtem dang akokba lenmang nung kati ka yaritsü aser lanurtem tejakleni anir aotsü ayongzüka liasü. Lanurtem anitetsü ya khuret ka ama masü saka maongka ka ama asenoki agizüktsüla, ta pai ashir.

Iba benjongmung tembangba sentong nung tesemdangertongti ka ama Anthony Nguillie, Secretary to the Government of Nagaland, YRS dena liasü.

Pai iba sentong nung jembidang, ajaki tetoktepba nung tajungtiba agi shilem agir alitsü imlar, ta ashir aser district ajunga nungi ketdangsur aser shilem agirtem dang pelaba lemsatep aser tarutsü nung timbai shilem agitsü imlaba lemsatep, kechiaser iba benjongmung ya department ajanga teti ayongzüka agitsü aser tarutsü nunga sapang

tajungba agütsüsü, ta ashir.

Quiz competition nung 1st Kohima, 2nd Dimapur aser 3rd Mokokchung liasü, Essay competition nung 1st Keviseto Mekro, Kohima; 2nd Imolemla Mokokchung aser 3rd Atoli N Sumi, Kiphire liasü.

Guitar Recital nung mezüngbuba jenjang Kohima nungi angu, tanabuba jenjang Phek aser tasembuba jenjang Tuensang nungi nguteta liasü.

Iba benjongmung tembangba sentong nung menden Vineikholie, YRO liasü aser Libemo Jami, YRO Wokha ajanga melepzüung o jembia liasü.

Kohima Police-i sen lakh 35 jenjang heroin gram 250 apu

Dimapur, Rongchii/April 21 (TYO): Kohima Police temi teti ama Kidima village nung interstate border nung April 20, 2023 nü mita aodang Kangpokpi, Manipur nungi Assam leni oyaa aliba Maruti Alto (registration number AS02R-3202) gari nung heroin tuozük gram 250 sapon cases 20 nung alepa bena aliba putet.

Iba dak sendakba nung gari anisang arishi küm 36 tain aser Kalapahar Bazar, Dist-Kangpokpi, Manipur nung alir Sachin Limbu apu aser temesepba mozü den gari ya pua liasü.

Bushisüngdangba mapang pua aliba temesepba mozü ya national market nung sen lakh 35 shi jenjang asütsü ta ngutet. Iba dak sendakba nung maneni bushisüngdangtsü atema Kezocha Police Station nung NDPS Act kübok ken o ka benoka lir.

Technology renlokba ama nisung temang anepaluyim tajungba akumer

Dimapur, Rongchii/April 21 (TYO): Technology tsütsü tejakleni tali renloka aoba ajanga khenyongi aibelen mesüi shidak procedure agitsü asoshi robotic spinal surgeries ya lenmang tajungtiba kumogo, ta Senior Director & Orthopaedic Spine Surgery, BLK-Max Super Speciality Hospital, Delhi, Dr. Puneet Girdhar-i ashir.

Eden Medical Centre, Dimapur nung osangbener senden ka nung jembidang Dr. Girdhar-i ashiba agi, spine surgery atema BLK hospital nung India nung integrated robotic system tajungtiba benoka lir aser tepenja akaba surgery tem agidang spinal anatomy nükla dangi arutsü atema artificial intelligence amshir, ta pai ashir.

Iba yagi tajangzük tajung agütsüba kisüung masü saka surgery agidang timtem kanga ajemdaktsür. Robot teyari nung surgery agiba ajanga tepenja

aliba surgery tem nunga terenlok jangja-jangja lir, ta pai ashir.

Eden Medical Centre, Managing Director, Dr. Lima Imchen-i ashiba agi, Nagaland aser northeast region nung healthcare services tajungtiba bener arutsü mechi küm ishika tejakdang Eden Medical Centre aser BLK-Max Hospital lungjema liasü.

Iba ana kübok BLK-Max nungi doctor temi Eden Medical Centre semdanga shiranger temang repranger aser teyari agütsür, ta pai ashir.

Nagaland Chief Minister's Health Insurance Scheme (CMHIS) health card alir shiranger ka treatment agitetsü asoshi Eden Medical hospital ya BLK hospital den sendakteptsü meranger, ta pai ashir.

Iba mozüki nungya Nagaland nungi oa temang repranga mozü agia amunger dang sen shilem 10 agi tajemba agir.

Anogo ana Alder College Fest 2.0 tenzükogo



Kohima, Rongchii/April 21 (TYO): Alder College Kohima ajanga Kohima Smart City Development Ltd (KSCDL) den lungjemer ananü Alder Fest 2.0 sentong Sepfuzou colony nung aliba college telungzük nung April 21, 2023 nü tenzükogo.

Iba ananü sentong tetoktepba balala alitsü aser mezüung anogo Inter-class tug-of-war competition, Open mic, Escargot sucking competition, Zumba with Avisa John aser Open Arm wrestling tetoktepba tem agia liasü.

Tananü anepdang 9:30 ako nungi tenzükaga inter-College Wrestling Competition aser Open crew dance competition amala alitsü.

Iba ama tesüngmangtsü sentong yanglua lanur/kaketshir nem pei tejangraba metetsü asoshi sapang agütsüba atema iba sentong tenzüktsüba mapang KSCDL Chief Executive Officer, Er Kezhazhou Theunuo-i ashir.

Skill development aser tanü putu nung ibaji kanga nüngdakba indang jembidang, Periodic Labor Force Survey, June 2021-July 2022 ajanga linük nung zünger mapa mangu timtiba aliba state tem rongnung Nagaland ya jenjang pezü buba nung lir aser

January 2022 tashinung mapa mongui aliba lanur state nung 92,382 liasü, ta Theunuo-i ashir.

Graduate sür alir jenti liaka lanur aika mapa mangu lir, aser tebilemstü kaji kaketshir graduate asüdang theory dang alir ashir practical skills malir, ta pai ashir.

Ano tebilemstü kaji meranga meinyakba mesüra tejak tentetba molungsentsü maliba ya lir, ano Nagaland nung zünger aliba lanurtem anioktsüsa industry/factory maliba ya kuli ka lir, ta pai ashir.

Iba tebilemstü koktettsü mechi kaketshir temi pei sempet renloktsü asoshi inyaktsüla, meranga inyaktsü temolungtetba alitsüla aser tesem mashi nung mapa mashi inyaktsü molunga alitsüla, ta Theunuo-i ashir.

Tanü tendak tajungtiba, meranga inyakba aser tanen makai inyakba ya kanga tongtipang aser itemji külemi aor, ta pai ashir.

Tanü tensa kanga sashia toktepba mapang lir aser tetoktepba maliba sector mali, anungji lanurtemi tajungtiba atema inyaktsüla, ta pai ashir.

"Nenoki meranga inyakba aser temolungtetba kisüngi nenok mangdang nung takok angütsü," ta pai ashir.

DC Kohima-i Nikshay Mitra Campaign semzüktsü

Dimapur, Rongchii/April 21 (TYO): Deputy Commissioner aser Indian Red Cross Society Kohima District Branch tir, Shanavas C, IAS ajanga April 21, 2023 nü Nikshay Mitra sentong tenzükja liasü.

Nikshay Mitra ya digital platform ka lir aser iba yagi India nung Tuberculosis (TB) agi shiranger anepaluba yimya khenyongi melenshitsü.

Ibai 2025 küm tashinung Tuberculosis samatsüsü India Ato Kilonser indang sentong ka lir. Pradhan Mantri TB Mukta Bharat Abhiyaan campaign/Nikshay 2.0 ya India tiri

September 9, 2022 nü virtual yimya nung sayaja liasü.

TB agi shiranger nem tetenlar (NikshayMitra) ajanga nutritional, vocational aser diagnostic teyari agütsüsüpür anidentsü iba campaign yagi bushir.

Iba campaign mezüung noklem nung The Indian Red Cross Society Kohima District Branch ajanga TB agi shiranger nisung ter nem ita trok atema nutritional care aser teyari agütsüsü, ta metetdakttsü.

Iba sentong nung Nagaland State IRCS Branch nungi teshimtet nübu tem dena liasü.

GOVERNMENT OF NAGALAND
DIRECTORATE OF ECONOMICS & STATISTICS
NAGALAND: KOHIMA

NOTICE

No. ES/Estt/Grp-C&D/Recru/Deptt/212/2022 : This is to inform all the applicants for the post of three (3) drivers under the Establishment of the Directorate of Economics & Statistics, Nagaland, Kohima that the Driving Test and viva voice will be conducted as per the schedule stated below.

Driving Test

Date : 28th April, 2023

Time : 10:30 A.M

Venue : Directorate of Economics & Statistics,
Nagaland, Kohima

Viva voice

Date : 29th April, 2023

Time : 11:00 A.M

Note:

- Candidates are requested to reach the venue 30 minutes ahead of the schedule time.
- Candidates are to produce the original documents.

Sd/-
NEIDILHOU ANGAMI
Director
Economics & Statistics
Nagaland, Kohima.

PM Modi-i Sudan linük nungi India nunger anitetsü tuyuogo

New Delhi, Rongchii/April 21 (Agencies): Hokolbarnü Ato kilonser, Narendra Modi-i senden ka ayongzüka Sudan linük nung tensa asadangba sülen pai ketdangsertem dang iba linük nungjagi India nunger aniteta anir arutsü atema sentong renemang, ta tuyuogo.

Tang rara adoka aliba Sudan linük tesem balala nung India nunger 3,000 dak tema lir.

Senden nungji Modi-i ketdangsertem dang Sudan tensa mita alitsü aser yangji aliba sensotem kümzüksü atema inyakang ta tuyuogo, ta sorkar sangdong ka ajanga metetdaksü.

"Senden nungji Ato kilonser Modi-i Sudan linük nung tensa asadang aser yangji tatalokbatem osang pa nem metetdaksü," ta kasa sangdong nung shia lir.

"Ato kilonserisa taoba

hopta India nunger ka injang agi yirua asüba atema mangyim jashi lemsatep," ta sangdong nung shia lir.

"Ato kilonseri region nung kidanger linüktem den tongtepratepa alitsüji kanga tongtibang, iba denji külemi Sudan nung aliba sensotem den-a tongtepratepang ta tuyuogo," ta PMO sangdong ajanga metetdaksü.

Ano külen tanga osang ka nung, Brihostibarnü New York nung India External Affairs Minister, Jaishankar-i UN Secretary-General, Antonio Guterres ajurua pa den Sudan tensa atema jembio.

"Künati Sudan tensa atema jembio. Künati G20 aser Ukraine nung rara atema-a jembio, ajisüaka tongtibangsüa Sudan linük

nung tensa atema jembio," ta Jaishankar-i metetdaksü.

Sudan nung rara adokba sülen Sudan yimtiba, Khartoum nungi nisung meyirjang aika jenshiogo aser tang tashi nung India nunger ka densema nisung 350 dak tema süogo.

Taoba hopta Sudan nung army aser paramilitary sepaitem tsüingda rara tenzüka sülen Indian Embassy-i India nunger sensotem dang kidang nungi mayazüksü tekümdangtsü metetdaksü.

General Abdel Fattah al-Burhan leniba nung Sudan Army aser Lt Gen Mohamed Hamdan-i aniba Rapid Support Forces na tsüingda tesüiba ita aika mangatetep adoka aruba sülen April 15 nü parnok tsüingda rara tenzüka liasü.

US nung totzü station ka nung India nunger kaketshir ka khaset

New Delhi, April 21 (Agencies): Brihostibarnü United States kübok Ohio nung auer telok kati India nunger kaketshir ka khasetogo.

Arrshi küm 24 kaketshir, Saiesh Veera ya Andhra Pradesh state kübok Eluru nungi liasü. Brihostibar aonung Veera inyakba totzü inokba station ka nung auer telok kati pa khaset.

Police-i sangdong ka ajanga, "April 20, 2023 aonung injang khadokba osang angashiba sülen Columbus Police tem 1000 block, W. Broad Street-i yoka liasü. Iba tesemji tonga aoba mapang nung police-i tebur tain ka injang agi yirur lia angu. Paji arrshi küm 24, SAIESH VEERA lir ta jangja. Ketdangsertemi pa hospital kati anir oa yari saka meküzmükteti asü," ta metetdaksü.

Kibong nung tanur rongnung tambusang, Veera-i par kibong yaritsü atema US-i oa yangji mapa inyakba den külemi zünga liasü. Pa tebu ya Eluru nung aliba C R Reddy College nung Economics tesayur liasü saka küm pezü tejaklen tu süogo.

Iba osang angashia Eluru sub-divisional police officer, municipal commissioner aser deputy collector nungeri par kibong semdang aser Eluru MLA, Alla Kali Krishna Srinivas (Nani)-ia par kibong semdanga mangyim jashi lemsatepba den külemi parnok dang tasü mang bener arutsü atema sorkari akokba tashi yaritepsü, ta metetdaksü.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A

[See Proviso to rule 8 (6)]

KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i agiadokogo aser 22.06.2023 anogo nung iba kiojenji "Kong koma ali", "Koma lidir yamaji" aser "Yangji aliba ajak" ayoktsü, 30.03.2021 anogo tashi nung Rs.6,77,89,622.52 (Rupees Six Crores Seventy Seven Lacs Eighty Nine Thousands Six Hundred Twenty Two and Paise Fifty Two only) asütsü, iba denji külemi sen tetemlok, cost, charges aser tanga teindokba balala adentsü aser ibaji M/s. Kivi Foam Industries, Partners: Shri Khehovi Yeptho aser Shri Ramesh Kumar Lakhota aser Guarantor: Mrs. K. Apila Yeptho dang nungi secured creditor-i agütsü. Reserve price ji Rs.4,08,00,000.00 asütsü aser earnest money deposit ji Rs.40,80,000.00 asütsü.

Kiojen osang tongmelang agi

Property ID: SBIN400030906756

Dimapur Mouza 3, Block: Thilixu Village (NC), Village- Thilixu, Dimapur, Nagaland nung Mr. H. Khehovi Yeptho (Final Mutation No: 1259/09/5529-30 dated 31.08.2009) tenüing nung aliba Patta No-17/35, Dag No.-5(B) vide Registered Gift Deed No-712/09 dated 02.07.2009, ali tasazük 1-Bigha 1-Katha 19-Lechas nung aliba kimong aser RCC buildings aser Hill Type Building (Factory shade) ka den yangji aliba ajak.

Bounded:

North tsütsüsen : Khutovi kimong,
South tsütsüsen : Donor kimong (Smt. K Apila Yeptho),
East tsütsüsen : Donor kimong,
West tsütsüsen : Nitovi kimong.

Iba sale atema telatetbatem State Bank of India nung secured Creditors website nung angütsü:

<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Date : 20.04.2023

Authorised Officer,
State Bank of India, SARB Jorhat

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A

[See Proviso to rule 8 (6)]

KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i agiadokogo aser 21.06.2023 anogo nung iba kiojenji "Kong koma ali", "Koma lidir yamaji" aser "Yangji aliba ajak" ayoktsü; 30.03.2021 anogo tashi nung Rs.5,38,65,063.30 (Rupees Five Crores Thirty Eight Lacs Sixty Five Thousands Sixty Three and Paise Thirty only) asütsü, iba denji külemi sen tetemlok, cost, charges aser tanga teindokba balala adentsü aser ibaji M/s. S.K. Autokrafts Private Limited, Directors: Smt. Kanili Sumi aser Shri Akato Sumi. dang nungi secured creditor-i agütsü. Reserve price ji Rs.2,55,00,000.00 asütsü aser earnest money deposit ji Rs.25,50,000.00 asütsü.

Kiojen osang tongmelang agi

Property ID: SBIN20061578839

1. Block No:8, Mouza No:3, Village- Signal Angami, Dimapur, Nagaland nung Mr. Akato Sumi tenüing nung aliba Patta No-1000, Dag No- 60/1105 (Allotment Order No-Rev-15/2003-D/pt/16572-75 dated 15.10.2012) nung kimong tasazük 01 Bigha-00 Katha 12 Lechas aser RCC building (s) den yangji aliba ajak.

Bounded: North tsütsüsen Catholic Prayer, South tsütsü Philip Zeiiang,
East tsütsüsen Road leading to Colony, West tsütsüsen Hopson Pochier.

Iba sale atema telatetbatem osang tejangja State Bank of India, secured Creditors indang website nung angütsü:

<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Anogo : 20.04.2023

Authorised Officer,
State Bank of India, SARB Jorhat

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A

[See Proviso to rule 8 (6)]

KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i agiadokogo aser 23.06.2023 anogo nung iba kiojenji "Kong koma ali", "Koma lidir yamaji" aser "Yangji aliba ajak" ayoktsü, 28.02.2020 anogo tashi nung Rs.2,25,68,412.00 (Rupees Two Crores Twenty five Lakhs Sixty Eight Thousand Four Hundred Twelve only) asütsü, iba denji külemi sen tetemlok, cost, charges aser tanga teindokba balala adentsü aser ibaji M/s. M. K. Plastic, Proprietor Shri Kupushe Sema and Guarantor (i) Shri Manan Ali, (ii) Smt. Lily Singit and (iii) Smt. Gokheli Sema. dang nungi secured creditor-i agütsü. Reserve price ji Rs.1,22,00,000.00 asütsü aser earnest money deposit ji Rs.12,20,000.00 asütsü.

Kiojen osang tongmelang agi

Property ID: SBIN400012984604

1) Shri Kupushe Sema tenüing nung aliba Sale Deed No: 3167/10 dated 22.12.2010, Patta No: 95, Dag No: 2/100, Block: Chekiye, Mouza: 3, Chekiye Village, Dimapur, Nagaland nung kimong tasazük 1 Bigha aser Building, factory shed aser tanga civil constructions den yangji aliba ajak.

Bounded:

North tsütsüsen : Hoshito Aye kimong,
South tsütsüsen : Hoshito Aye kimong,
East tsütsüsen : Colony Road,
West tsütsüsen : Hoshito Aye kimong.

Iba sale atema telatetbatem osang tejangja State Bank of India, secured Creditors indang website nung angütsü:

<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Date : 20.04.2023

Authorised Officer,
State Bank of India, SARB Jorhat

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A

[See Proviso to rule 8 (6)]

KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i agiadokogo aser 26.06.2023 anogo nung iba kiojenji "Kong koma ali", "Koma lidir yamaji" aser "Yangji aliba ajak" ayoktsü; 30.03.2021 anogo tashi nung Rs.7,05,35,522.00 (Rupees Seven Crores Five Lacs Thirty Five Thousands Five Hundred Twenty Two only) asütsü, iba denji külemi sen tetemlok, cost, charges aser tanga teindokba balala adentsü aser from M/s. Renomme Coir Industries, Partners: Mrs. K Apila Yeptho aser Shri Ramesh Kumar Lakhota aser Guarantor: Shri H. Khehovi Yeptho dang nungi secured creditor-i agütsü. Reserve price ji Rs.7,28,00,000.00 asütsü aser earnest money deposit ji Rs.72,80,000.00 asütsü.

Kiojen osang tongmelang agi

Property ID: SBIN200030933821

Block No: Thilixu Village (N/C), Mouza No:3, Dimapur, Nagaland nung Mrs Apila K. Yeptho tenüing nung aliba Patta No-17, Dag No.-5 vide Allotment Order No: VLS-29/72-D/pt/670-74 dated 11.01.2014 nung ali tasazük 4-Bigha 3-Katha 10-Lechas aser Hill type building ka den yangji aliba ajak.

Bounded:

North tsütsüsen : Gari lenmang,
South tsütsüsen : Samuel Sema,
East tsütsüsen : Mr Khohovi Yeptho,
West tsütsüsen : Singrijan Road.

Iba sale atema telatetbatem State Bank of India nung secured Creditors website nung angütsü:

<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Date : 20.04.2023

Authorised Officer,
State Bank of India, SARB Jorhat

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A

[See Proviso to rule 8 (6)]

KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i agiadokogo aser 23.06.2023 anogo nung iba kiojenji "Kong koma ali", "Koma lidir yamaji" aser "Yangji aliba ajak" ayoktsü, 28.02.2020 anogo tashi nung Rs.2,25,68,412.00 (Rupees Two Crores Twenty five Lakhs Sixty Eight Thousand Four Hundred Twelve only) asütsü, iba denji külemi sen tetemlok, cost, charges aser tanga teindokba balala adentsü aser ibaji M/s. M. K. Plastic, Proprietor Shri Kupushe Sema aser Guarantor (i) Shri Manan Ali, (ii) Smt. Lily Singit aser (iii) Smt. Gokheli Sema dang nungi secured creditor-i agütsü. Reserve price ji Rs.66,00,000.00 asütsü aser earnest money deposit ji Rs.6,60,000.00 asütsü.

Kiojen osang tongmelang agi

Property ID: SBIN400012884452

1) Village Nagarjan, Mouza 3, Dimapur, Nagaland nung Smt. Lily Singit tenüing nung aliba Partition Deed No:68 A/16 dated 23.03.2016, Patta No:1019, Dag No:824/825 nung kimong tasazük 2 Kathas 5 Lecha aser Building den tanga civil constructions aser yangji aliba ajak.

Bounded:

North tsütsüsen : Shri Thepusetuo Meruno kimong,
South tsütsüsen : Approach Road,
East tsütsüsen : Approach Road,
West tsütsüsen : Mangboi Changloi.

Iba sale atema telatetbatem osang tejangja State Bank of India, secured Creditors indang website nung angütsü:

<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Date : 20.04.2023

Authorised Officer,
State Bank of India, SARB Jorhat



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 22, 2023

Lumiba anenba benjong

Tanü ya alima ajunga nung Muslim nunger taoba anogo 30 nü tashi lumia monger anenba benjongmung anogo lir. Iba benjongmung anogo dang parnoki Eid al Fitr ta ajar. Ibai Arab nunger oshi aser Eid Fitr tetezüji Lumi anenba Benjong. Alima nung tangar tamangba yimsü shia dak nungi asenoka ajizüka asenok tamang akangshitsüba yimya mapatem aika lir. Item rongnungji Muslim nungertemi parnok Islam ita tukububa Ramadan ita piyong anogo 30 anepdang anü adokli nungi anü mai tashi tzüa majem lumiba tekülemba yimsü ya asütsü. Ibaji asenok Khristan-tem, talisa Naga Khristan-tem aser item rongnungjia asenok Ao Khristan-tem khen khen anepdang ghonda asem pezüka lumia sarasadem mapang agiba sentongtem denbo medemdangtsüla masü. Islam itatem rongnung Ramadan ita ya Muslim nungertemi temeshi ita ta amanger, kechiyong iba parnoki amangba ainker Muhammad nem Tsüngremi mezüng parnok laishiba Quran nung zülutsü o agütsüba ita ya liasü ta parnoki amanger. Asenok atema tangazüktsü kaji, Muslim nungertemi Ramadan ita anogo 30 tashi lumiba mapang ya asenok ama mapa kecha meinyak lumia amungtsüba masü saka akhi alu mapa kechi inyaka liasü, kasaji anügdang kecha machi aser tzüa majem inyaksü aser anü lur külenang chia ajemtsü. Atangji, lumiba ya tamangba yimsü ajak nung lir. Aji oda, Muslim aser Khristan-temi dang masü saka ano Hindu aser Jain nungertemi küm nung anogo aika lumir. Item tamangba yimsü amangertemi lumibajia Muslim nungertem ama lumiba mapang pei mapabo methitemi inyaka lumir. Atangji, koba yimsü südirsiüka lumiba nükjidong aser tetezüji kasa dang lir. Ibai pei temang nung timtem agia Tsüngrem den jembiba mapang lir. Aji oda, Muslim nungertem asoshia parnok Ramadan ita piyong lumibaji pei temenen meshiteta amongba mapang lir. Parnok tekülem aser sarasademba yimyajia asenok amai menden tajung nung mener tanemi oren ka ana shir anentsüba masü saka parnokbo ali nung tenütsü agi tsüketa apudaka sarasademtsü aser nokdaker teka agi tenarong nung amer "Allahu Akbar" ta ayimtentü. 'Allahu Akbar' tetezü Tsüngremsa Tulutiba. Iba tenüngsang ola ya Muslim nungertemi Eid anepdang parnok lokti sendena yur ayimtena sarasademba sentong ka asütsü. Ita ka songtema anügdang tzüa majem lumir, Eid benjongmung anogo nung yabo kinunger aser medemertem den chiyongtsü tajung lemsatepa pelatepa chiajema amongba anogo lir. Iba anogo nung yabo nisung shinga mayatsüla aser metzuratsüla ta Muslim nungertemi amanger, anungji parnoki sensakertem asoshi temeim mapa inyaker. Atangji, Eid benjongmong anogo ya Muslim nungertem asoshi chia ajemba aser temeim mapa inyakbaji dang masü saka taidoktepa anogo lir. Aji oda, iba anogo nung Muslim nungertem rongnung kati ka dang "Eid Mubarak" tetezü 'Tepela Benjong salem' ta shia pelateper. Laishiba tsütsübo asenok ya alima nung bendanger saka shitakba Abraham nungi jakzükba senso purtemji Muslim nunger o Yihuda nungertem na ya dang lir. Muslim nungertemi parnok ya asenok Laishiba Lipok tapu nung shia aliba ama Ishmael dak nungi jakzükba purtem ta amanger, anungji Moriah tenem nung tuagi Abraham-i Tsüngrem nem bendanga agütsütsü asoshi anir atuba jabaso to Abraham chir tambusang Ishmael liasü ta parnoki amanger saka Laishiba nungbo Isak liasü ta asenoki Lipok tapu 22 nung azünger. Ibaji dang masü Muslim nungertemi Tsüngremi Abraham dang par jabaso taküm tenla agütsütsü ashibaji asangsang nung masü saka mangdang nung jembiba liasü ta amanger. Aji oda, Muslim nungertemibo Abraham-i par jababo Ishmael Tsüngrem nem bendanga agütsüba anogojia benjong kuma amonger. Iba benjong dang Eid al-Adha, 'Bendanga agütsüba benjong' ta ajar. Iba benjong ya parnok Islam ita ter anabuba nung anogo asem pezü agia amonger. Atangji, Tsüngrembo ka dang aser Paji Abraham, Isac aser Yakob Tsüngrem. Iba Tsüngrem chir Yisu Khrista, shibai asenok temenen tesama tia nungi kümzüktsü asoshi Pa taküm bendanga agütsü, Pa asüba, shia aruba aser ano tanaben asenok anii arutsüba temeim aser teimla dak amangertemji asenok lir. Muslim aser Hindu nungertem asoshi Tsüngrem külebajia ita junga lumiba, ali nung apudaka sarasademba aser temeim mapa inyakbatem süra asenok asoshi asen Tsüngrem külebajia kechi komaka asütsü (?) ta bilemdangtsü tanü ya mapang tajung lir.

OLEMSABANG

Iba lima nung tepur ajungba mesüra majungba, taküm aliba mesüra maliba osettem ajak tsüngremi nükjidong ka yur yanglu ta angateter

R.Imkong Lkr, Aolijen Mepu, Mokochung

Iba lima nung tepur tajung süngdonglidongtem, narotem, ayazüba shirurutem aser tatemsa nisung yanglu ta Lipok tapu nung shia angur. Item tepur tajungtem yangluba rongnung asenok meimchirtem ya Kibur kümdaktsü ta Lipok tapu nungji jangja jangja shia angur. Yamaji asenok meimchir ya jenjang balaka nung yanglu ta angateter. Taoba ,mapang alima nung tepur tajung Rome yimti indang aikati jembiba angashia aruogo, aser ano Lapu naro ka arem nung pa sasa ina tepen apungba indang Dawid Chuba chir Solomon chuba shia akaba-ia madoksaba indang atishia jembiba angashia aruogo. Aser ano ka kong osettsüset tapu ajak rizünga ayudak tepur ajungba indanga nüburtemi kanga nungtugosa jembiba aruba angashia aruogo. Tatishitsü agi English nunger nungtugo nisung ana tenüng agi Romeo aser Juliet na tepur ajungba indang otsü nüburtemi kanga sapua jembiba angashia aruogo. Aser ano yamajisa asen Aortem tar nunger otsü nunga Jena o Etiben na tepur ajungba indang kanga sapua jembiba angashia aruogo, saka tanü item ajakji süidema oadokogo. Aser tanü mapanga alima nung tetsür aser tebur tepur ajungba toktepa indang television aser osang kakettep nung ngua aser angashia arudagi, iba ama tepur tajung toktepa dangji English oshi agi (the world beauty contest or world handsome contest) ta ajar. Iba ama tepur tajung toktepa nung temaba jenjang angurtem dangji English oshi agi (the most beautiful or the most handsome man in the world) ta ajar. Yamaji asen oshi nunga alima ajunga nung tepur tajungtila mesüra tepur tajungtiba ta ajatsü akok. Iba ama tepur tajung toktepa nung temaba jenjang angurtemji pei sasa meranga yanglutetba tepur ajungba süra, item amala dangji English agi (artificial beauty or handsome) ta ajatsü akok, saka item amala tepur ajungbatemjibo mapang tatsüka dang lirbo pa mesüra la tepur ajungbaji tanem tanemi samaa oadoker ta metetdi. Saka pa nungi mezüngyongi tepur ajungbatemjibo oda sentsüa tera balaka alir ta jembir, iba amala tepur ajungba dangji English oshi agi (original beauty or handsome) ta ajatsü akok. Item amala tepur ajungba dangji Tsüngrem nungi anguba sempet ta ajatsü akok. Tanabuba nung tepur ajungba ya karbo balaka angutsü, iba tepur ajungba yabo khen agi tereprangtsü nunga balaka alir, aser item amala jagi kar den khen menürema jembi nung parnokji odang per-l puaba ama dang puadoker alir ta jembir. (charming by their charismatic power). Item amala sempet balaka alirji Tsüngrem nungi anguba sempetbo masütsüa akok ta jembir. Aji agi parnok amala denji meimtepner aikasa alir ta jembir. Saka item amala tepur ajunger jagi pei tepur ajungbaji jungabo memeteti alir, aser parnok amala denji shirnoki kibong kümdir mapang memenui yakta palalulatsüsa akümer, kechiba ta süra, item amala nisung jagi pei kinungtsü mesüra kinungbor jagi mela mela laktetadoker alir ta jembir. Aser tia makartembo parnok amala denji alidang arishi yakta tembanger, saka item tubo tashi taitba aser sentsüa tajungba tang akümer ta jembir. Aji oda item amala tesür tepur ajungertem denji aikati meimtepner, saka parnok tepur ajungba ajanga medemertem tsüngda nung mangatetep teti adoker. Anungji lai yamai ashir, kechisü nung Tsüngremi ni tepur yamai junga yanglutsü? Aser kü mechi nung ozü medemertem tsüngda nung tenük meremtep teti adoka tang alir! Anungji ni kü sasa medemertem nem ni sempadaktsütsü atongdi ta sür la süoshi tejentem tu kar bener arua tapok aika keta mejepsar aser itemji sübur (semoker) kima yimdongi oadang ano iba sübutsü tamajung sübuba jagiang la tu tazüba mesüra tajungba tang reprangteter ta ashir, idangjibo la jagi kechianga mesayangi akümba angutsü. (wearing such a shabby dresses looks more beautiful, attractive and matching).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



April 17 nungi April 20, 2023 tashi Dimapur Ao Baptist Arogo (DABA)-i Old Showuba Ao Baptist Fellowship nung Father School kanga temoatsü nguaga agütsüogo. Fellowship sanger-i DABA dang kanga pelar. Tebutem koba temoatsü nguaga, Kodak matong tashi iba temoatsü nung otetsü ajaki sarasademjangma, ta Old Showuba Ao Baptist Fellowship nung pastor, M.Yanger Ozüküm-i sangdong ka nung metetdaksü.

Karnataka nung temelenshi atema Khristantemi vote agütsütsü

Rongchii/April 21, 2023: Taruba ita Karnataka Assembly election nung Khristantemi state nung temelenshi atema vote agütsütsü, kechiyong state nung tang aliba sorkari Khristantem sendoker, ta Khristan lenir kati metetdaksü.

April 20, 2023 nü osangbener den jembidang Bengaluru nung Catholic lenir, T Vellankanni Paul Raj-i, "BJP indang mapatongtem ajanga Khristantem sendoker aser sempar," ta ashi.

Karnataka nung nütsüing million 61 lir saka Khristantem nütsüingbo shilem 1.87 dang lir aser tesüiba küm aika state nung Khristantem amokmerener; talisa 2019 küm July ita nung BJP-i Congress-Janata Dal (Secular) teloktep sorkar atsüngdokba sülen Khristantem anema inyakba kanga bulua kümogo, ta pai ashi.

2022 küm May ita nung state nung anti-conversion ozüing agizükba sülen Khristantem aser Khristan schools aser hospital temanema inyakba kanga bulua kümogo, ta pai metetdaksü.

"Onoki (Khristantem) kodanga ozüing alema meinyaker, ajisüaka linük yangertsü atema dang inyaker. Ajisüaka BJP sorkari onoki mepishiba ama anti-conversion ozüing magienba ajanga onok anema inyaker," ta pai ashi.

Talisa Horticulture minister, Munirathna Naidu-i March ita nung lokti senden ka ayongzüka Khristantem dang azüktsü ajungshiba agi Khristantem taliba jashidaksüogo, ta pai ashi.

March 31 nü television interview ka nunga minister-i kasa tayongzükbaji agüja liasü.

Election Commission-i tashishitsü oji agizükba sülen ang April 6 nü police-i pa anema ken o benoka liasü.

Bangalore Arogo nung Public Relation Officer, J K Kantharaj-i, "Minister-i jembiba oji ruling party-i onok anema maneni inyakba dang lir," ta ashi.

Kantharaj-i, "State nung Khristantem teyarir mali aser onok anema inyakba tatalokba aika lir. Yamaji süaka parnok

melung masür aser minister-i pa pusemertem dang yimjak nung onok dak zükang ta ajungshir," ta metetdaksü.

Bengaluru nung aliba Faith Ministries nung Pastor, Harry Pereira-i, state nung right-wing yimtenren lenirtemi onok anema inyakbaji yimya ka ama kümogo saka police-i parnok anema kecha meinyaker, ta ashi.

"Tashi aliba ketdangser shingai onoki ashijaji mangar, anungji Tsüngrem dang ang shisa meshia sarasademtsüa akümer," ta pai ashi.

Raj den Khristan lenirtemi, Khristan densema minorities-i democratic temeden amshitsü atema state assembly election ya maongka tajung lir, ta ashi.

"Election nung vote ajak züingshir. Vote kati-a candidate ka tia latetsü akok," ta pai ashi.

Raj-i, Khristantem aser Muslim nung densema minorities ajak senteper voters

shilem 13 jungnüa lir, anungji sorkar melenshitsü atema kanga shisa kaa vote agütsütsüla, ta ashi.

State nung Muslim nungertemia BJP dang kanga jashir, kechiyong shisaliok rejutem nung Muslim tsürtem tekolak meiba sü nokdangtsü atema sorkar telemetba agi aser shisaliok den mapa nung Muslim nung nem shilem 4 wazüka yuja aliba Hindu nung nem lezmüksüogo.

Kolar Distirct nung aliba Kolar Gold Fields nung trade union lenir, G Jayakumar-i, BJP-i Khristantem aser Muslim nungertem yirutsüogo, ta metetdaksü.

Catholic Khristan Jayakumar-isa, "Taruba election nungbo Khristantemi BJP nem vote magütsütsüa akok," ta ashi.

Karnataka nung May 10 nü election agitsü aser May 13 nü vote azüingtsü.

ANOGO ABEN TSÜNGREM DEN

Tsüngremer Miim Tenzükertem

T.ken 104:1-4

Nai tenyartem indang shisadanga lir ma? Yimya nung aiben asenoki parnok indang meshisadanger kechiaser asenoki parnok mangur aser mangashir. Saka parnokji Tsüngrem osang abenertem ta Tsüngrem O i ashir. "Shibai mopungtem Pa osang abenertem kümdaktsü, Pa tenzükertem milak adokba mi kümdaktsü" (t.4). Asenok mapa nung Tsüngrem mi asenok kar- Pa tenyartemi, Pai mulungba ataloktsür.

Tenyartemi teti Tsüngrem tenzükertem. Teyangluba nung parnokji ken atener. Parnoki Abraham semdang. Kodang Yirusalem tsükchirtemi amak parnok Hezekia dangi aru, aser tenyar kati temeranger sepoy 185,000 tepset. Parnoki Messia arutsü osang sangdong. Yisu asodang parnokji ken aten. Kodang arem nung Pa atitang, parnok Pa den liasü. Gethsemene Atsüki nung Pa den parnok liasü. Aser tang Yisu kotaki atu, aser Kotak nung parnokji Pa külemer aser sentsüwangshir.

Tenyartemi asenoka yarir. Ibri 1:14 nung ashir, "Parnok ajak tekümtet senmang amangtsü pur tenzüktsü yokbatem, tenzükba tanelatem masü no?" (Ibri 1:14). Tenyartemji tenük agi manguba Tsüngremer army, Pa kilirtem, asenok asoshi mapa inyaker.

Kodang asenok kotaki tudir, idakji asenoki Kotak tenyartemi asenok lendong aika nungi kümzüka yariba asenoki metettsü. Asenok kija masü ta asenoki tanü pelatepedi. Asenok anemertem dang nungi asenok den alir tuluba.

Na tenzüktsü Tsüngremi tenyartem yoker. Iba yagi parnokji na asoshi mapa inyaker ta na tasü itdaktsütsü. Tanü Pa tenyartem aser parnokji tenzükba asoshi Pa tenüing sangang.

Sri Lanka nung Easter Sunday nü bomb lendong nung asürtem bilemtet



April 21, 2023 nü Colombo nung Arogoi ayongzüka sentong nung Sri Lanka nung yimsü balala nungi lenirtemia shilem agiba noksa nung angur. 2019 küm Easter Sunday nü bomb amshia Tenla ki ana amakba lendong nung asürtem atema temeden meshija kilometer 40 tashi nisung nokdaker longkak aita liasü.

Colombo, April 21 (Agencies): 2019 küm Easter Sunday nü Sri Lanka yimtiba, Colombo nung bomb amshia Tenla ki ana amakba mapang asürtem atema ochi temeden takhangba agüja Sri Lanka nung Arogoi kilometer 40 nisung nokdaker longkak aita sentong ka ayongzüka agiogo.

April 21 nü Arogoi ayongzüka sentong nungji

tanga yimsü amangertema aikati shilem agia sorkari takoksa angurtem nem temeden magütsüetba anema longkak ait.

Brihostibar anepdang 8:45 ako nung minute ana shi mokremer kiralongrartemi bomb amshia amakdang asürtem bilemteta akhüm agütsü, iba sülen Colombo nung Cardinal, Malcolm Ranjith-i yimsü lenirtem, bendanger

ketdangsertem, iba lendong nungi kümzükertem aser takoksa angur kibong züingsemtem den jemi.

Colombo yimti tezülen Kochchikade nung aliba St. Anthony memorial nung ayongzüka sentong nungji jembidang Ranjith-i, National Thowheed Jamath (NTJ) lenir Saharan Hashim leniba nung Easter Sunday nung bomb amshia amak, aser pa ya sorkar military intelligence den tesendaktep junga liasü, ta metetdaksü.

Ranjith-isa, "Military intelligence aser Saharan kiralongrar telok na tsüngda tesendaktep alibaji sorkari bushisüngdang mesütetba atema onoki sasar," ta ashi.

Paisa, 2019 küm iba lendong atalokba mapang intelligence unit ketdangsertem dang asüingdangyatsüla, ta sorkar nem takhangba agütsü.

"Presidential Commission-i benokba ama Attorney General Department, police aser sorkari inyaksü arendakba atema onoki sasar," ta paisa shisem.

Iba sentong nung jembidang Apostolic Nuncio Archbishop, Brian Udaigwe-i, "Iba tatalokba bilemteta amongba sentongtem ya mangyangtsü atema masü saka takoksa angurtem atema ochi temeden bushitsü aser sarasademtsü atema lir," ta ashi. Colombo Arogo nung otongdar, Cyril Gamini-i, ochi temeden mangu tashi aser aibelenertem anema meinyak tashi Arogoi raratsü, ta metetdaksü.

2019 küm Easter Sunday nü (April 21) kiralongrartemi bomb amshia Tenla ki ana den hotel aika amakdang nisung 279 asü. Islamic kiralongrartemi bomb amshia amakba sülen anogo ishika tsüngda nisung 200 dak tema pua liasü, ajisüaka shinga maitsüi chiokogo.

Kiralongrartemi lendong agütsütsü, ta jelia sorkar nem tekümdangtsü osang metetdaksür liaka sorkari iba tatalokba menokdangteti liasü. Iba lendong atalokba sülen Sri Lanka Tir, Maithripala Sirisena-i iba tatalokba bushisüngdangtsü atema tetuyuba agüja liasü.

Sudan nung RSF temi ghonda 72 ceasefire alitsü sangdonger

Khartoum, Rongchii/April 21 (Agencies): Linük yimtiba, Khartoum nung army tem den maneni kanga sashia raraka Sudan indang paramilitary telok Rapid Support Forces (RSF) ajanga ceasefire ka yakta tenzüksü ta sangdonga liasü.

RSF ajanga sangdong ka nung, ghonda 72 ceasefire ka alitsü aser ibaji Hokulbar anepdang 6:00 ako nungi tenzüksü, koba Muslim nung Eid al-Fitr benjong tenzüksü temaitsü alitsü, ta shia liasü.

"Khen atema rara anenba ya Eid al-Fitr temoatsü den külemi lir, aser ibai nüburtem ainshitsü asoshi humanitarian corridors lapoktsü aser parnok kinunger ajurutsü asoshi lir," ta sangdong ajanga ashi.

Hokulbar anepdang liasü. Khartoum nung injang-bomb tesashi khalokja liasü aser RSF temi mitkar dak tai tongloksü. RSF aser army tsüngta minute ishika khataper ceasefire ya tenzüksü, ta Khartoum yimti north tsütsü nungi osangbener kati ashi.

Army tsütsü ceasefire ya alitsü asü masüar, osang kecha mali.

General Abdel Fattah al-Burhan lenisüba kübok mitkar aser General Mohamed Hamdan Dagalo lenisüba kübok RSF tsüngta taoba hopta tashi agi raktep tenzüksü azüdokshia arudang ceasefire benoktsü aiben merangaka takok monguteti arur. Nisung ana ya Sudan nung taoba military sorkar nung alliance

Eid mechi aser civilian tem raradak tesem nungi ainshitsü mechi asemnü merarai alitsü asoshi alima nung lenir temi ayongzüka liasü.

Sudan rara nung nisung 400 dak tema süogo aser ano 3,500 shi yirua lir, ta World Health Organization ajanga Hokulbar nü ashi.

"Nisung 413 süogo aser 3,551 yirua lir," ta WHO odongtar Margaret Harris-i Geneva nung osangbener dang ashi aser UNICEF-ia asürtem rongnung tanur toku aser 50 dak tema yirua lir, ta ashi.

Civilian meyririjang aika Khartoum nungi jena ogo aser anüolen Darfur nung raradak nungi ajener aika Chad linük tongogo.

Russian fighterjet kati aibelena par yimti nung bomb pokloktsü

Moscow, Rongchii/April 21 (Agencies): Russia nung raradang amshiba Sukhoi-34 fighter-jet kati Ukraine den arütsü nungi mile 25 shi pilar par Belgorod yimti nung aibelena bomb ka poklokja liasü.

Iba bomb yagi ali nung ongen feet 60 shi adokdaksü aser kanga sashia apokba ajanga gari ka anasa aliba dokan ka kilem nung ajungketa liasü.

Regional governor Vyacheslav Gladkov-i ashiba agi, ketdangsur temi raksar aliba storey toku atongtepa aliba ki ka nungi nisungtem ainshitsü tuyu.

Nisung asem yiru aser ki aika raksatsü, ta pai ashi.

Social media nung video prokshiba nung iba bomb apokba ajanga yimti tiyong anasa Prospekt Vatutina nung gari tem senzüba mapang gari ka supermarket kilem nung ajungketa liasü.

Russian defence ministry ajanga sangdong ka nung par Su-34 fighter bombers kati aibelena Brestibar nikongdang 10:15 ako (par mapang) meta aircraft ordnance chioka liasü, ta ashi.

Iba ya bureaucratic yimya nung jet ajanga aibelena nok-nü khaloktsüogo ta ashiba lir. Ajisüaka parnok kobar tejangja mashi.

Bomb ya city centre nungi kangabo mepilai aser nisungtem aliba ki anasa lenmang ana lemjem nung tsük.

Tetsür ana temang anepalutsü atema mozü kidangi anir ogo, ta governor-i ashi. Ajisüaka Russian bomber kati nisung mazüngi alidak tesem ka nung kongshiba yagi lendong timtem tamajungba ajurutsü liasü.

"Nisung kata masüba asoshi pelar," ta pai social media nung ashi. Iba lendong atalokba indang CCTV footage nung yangji alirtem tia kaa jembuba amai sayur.

Gari aika lemjem ajanga aoba sülen oset ka ali nung alua tsük.

Ali nung tsükli mapok saka second 18 shi lir apok dang lenmang shilem ka pokteta adoka ajanga oa aliba gari ka nung kongshi aser anena aliba gari ka anüngleni pokteta yoka supermarket kilem nung temdak.

Iba tatalokba ya Russian mitkar asoshi maksü ka süaka

parnok aibelen nangzüksü ajanga iba yagi Russia-i tang tashi Ukraine nung "special military operation" agir ta jembiba nung nübur tangateta memelenshitsü amai sayur.

Rara mapang iba ama aibelen timtem ajurur aser mapang kakabo takoksa tulu sa ajurur. Taoba küm October ita Sukhoi fighter jet ka Russia nung Yeysk yimti nung tsükoka nisung 13 takum sama.

Brestibar aonung lendong atalokba indang ya bushisüngdang tenzüksü, ta mitkar temi ashir, saka iba bushisüngdangba osang yimjak nung sangdongtsü meimlar, ta

taoba mapang mitkar inyaka alir kati ashi.

Anepdang arudangbo kanga mazüngi aliba lenmang ya yanglushi tenzüksü liasü. Mapa timba hopta tatemlen inyaksü aser Hombarnü nungi senzütettsü, ta mayor-i ashi.

Russian jets tem Ukraine leni aodang anogoshi amai nisung 370,000 aliba Belgorod yimti ya ajanga aor.

Iba yimti ya Ukraine indang yimti tulutem rongnung tanabuba jenjang nung aliba Kharkiv north tsütsü lir aser Russia-i taoba küm nungi tenzüksü Ukraine den rara arudang Ukraine nungeri iba yimti mapang shia amaker.

OJA ASER OBA TENA KIBONG KÜMER KÜM 50 AJUNGBA

20th April 1973 - 20th April 2023



Mr. Y. TALIMEREN KICHU & Mrs. N. LANUANGLALKR (Chungtia Village)

Temeim tsürabur ana kibong kümer küm tenem tashi Tsüngremi Pa kabu manung anir aruba atema Pa nem tenüngsang tulu agütsür.

Tsüngremi nena prongla nem ano maneni takum aser mapang tajungtiba moajangma.

~Temeim Chirnur, Semchirtem aser Anükapang.

MULUNGNEN O



ASO : 15-07-1935

ASÜ : 09-04-2023

Obala asür Akangchuba Longchar (Mongsenyimti) akhümlü wadang tembanger aoba anogo onok asükhu agi neneter shisabulua alidang kija kibong shirnokisa onok den taku marok lemsatapa rongsen, nübu aser sarasadem agi yaritepogo nenok ajak dang kanga pelar.

~Jalajabaso, Semchirseemnur, Kidangkimang.

Mulungnen O



ASO : 26/01/1973

ASÜ : 16/04/2023

Onoki teti meima aliba asür Mrs. Tsüknunglemla (Longkong), shirang yipden nung alidang nungi tasüba anogo tashi kija, kibpng aser lokti balala shirnokisa ozü den nübu, rongsen, shisatsü aser sarasadem agi yaritepogo, nenok ajak dang kanga pelar.

Tsüngremi nenok ajak maneni moajang ta ozü sarasadem.


~Temeim Kinungbo, Jabaso aser Kinungertem.

Mokokchung District VDB Association General Conference

Date: 26/04/2023

Time: 11:00 AM

Venue: Town Hall, Mokokchung



Guest of Honour : Shri. Shashank Pratap Singh, IAS Deputy Commissioner, Mokokchung, Government of Nagaland

ORDER OF PROGRAMME

- In the Chair : Office Bearers
- Introductory Speech : Dr. Imtünungba Atsongchanger, President
- Keynote Address : Smt. M. Toshimongla Kichu, Project Director (DRDA Mokokchung)
- Short Speeches : (a) Shri. Temsumoa Imsong Council Chairman, Chuchuyimpang 5 mins each. (b) Shri. Aonungsang Mollier Council Chairman, Mongchen (c) Shri. Imkonglemba Council Chairman, Chakpa
- Guest of Honour : Deputy Commissioner
- Reports followed by discussion : (a) General Secretary Report (b) Audit Report (c) Nominating Report
- Vote of thanks : Shri. Imtiyanger Imchen, Executive member

NB:

- VDB Secretary, Council Chairman, VDB Member (3 members) from all the recognized villages under Mokokchung District are invited to attend the programme.
- Agendas or suggestions from the VDBs/Block Associations, Village Councils if any must submit in written to the office latest by 24th April 2023.
- Refreshment will be served after the programme

ALI TAYOKTSÜ LIR

Ao Yimkum, Dimapur

2 Bighas, 200/sq.ft.

Phone Number: 9612071247

Office of the Settsü Village Council TENÜNGSANG AGÜTSÜR

Rev. M. Repa Longkümer aser Mrs. Yashinungla Jamir, tena jabaso Mr. Imlisanen Lkr-i Institute of Banking Personal Selection Exam nung Manager (IT) Rural Bank Nagaland, jenjang ngutet nung sensosanger ajak tenüng nung Settsü Kosasanger Putu menden-i pelaba sangdonger.

Tsüngremi ne taküm aser wadang temjena moajangma.

Sd/- Moatemjen Chairman

Sd/- Moakaba Jr Secretary

Sangtemla Ward-i 4 Buba Mkg. Inter Ward Football Tournament 2023 kokogo



4 Buba Mokokchung Inter Ward Football Tournament 2023 takok marok abener Sangtemla Ward nungi asayartem den tetushi tejaoker Dr.I.Wati Imchen, Principal, Fazl Ali College külemi tangokba noksa nung angur.

Mokokchung, Rongchii/ April 21(TYO): Tanü Imkongmeren Sports Complex Mokokchung nung 4 Buba Mokokchung Inter Ward Football Tournament final nung Sangtemla Ward-i Penli Ward kochteta iba asayamung takok marok benogo.

Tanü iba tatembangba sentong nung tetushi tejaoker Dr.I.Wati Imchen, Principal, Fazl Ali College liasü aser pai tayongzükba olen tatsüka jembir kelen iba asaya tenzükba liasü.

Tanü asaya tenzükba kelen minute 4 buba nung Sangtemla Ward nungi Jersey No.9 R. Achi-i goal ka yok aser ano maneni R. Achi-isa minute 9 buba nung goal ka yokte, saka minute 10 buba nung Penli Ward nungi Jersey No.17-i goal ka yok aser ano Penli Ward nungisa minute 16 buba Jersey No.3

Limakumzük-i goal ka yokteta telok ana tsüngta goal kasasa akum.

Iba sülen anisüngzük mapang agir kelen minute 47 buba nung Sangtemla Ward nungi jersey No.9 R. Achi-isa goal ka yok aser pai hatrick ajangzükte, saka minute 54 buba nung Penli Ward nungi Jersey No.17 Ayimtiba-i goal ka yokteta tanabena kasasa akum.

Atakzükja aliba mapang minute 90 tashi nung telok ana tsüngta goal kasasa dang asünung mapang tali minute 20 asaya saka telok katia maangka magitet nung penalty metsütep.

Penalty metsütepba nung Sangtemla Ward-i goal 3-2 agi kochteta 4 Buba Mokokchung Inter Ward Football Tournament takok marok benogo.

Telok anapronglai iba final nung kochteta takok marok

abentsü meranga asayadang Penli Ward nungi Jersey No.8 Imsüwapang yellow card achi aser ano Sangtemla Ward nungia Jersey No.4 Talisünep, Jersey No.12 Nungshichujang aser Pachapong Jersey No.1, par asem yellow card achi.

4 Buba Mokokchung Inter Ward Football Tournament nung jurila sempet angurtem yamai liasü:

1. Highest Scorer
- Tarepnungsang (Tongdentsüyong Ward) 5 goals.
- Supongmeren (Artang Ward) 5goals
2. Best Goalkeeper
- Imsütoshi (Penli Ward)
3. Best Defender
- Namang (Artang Ward)
4. Player of the Tournament
- Molutsüpong (Sangtemla Ward).

BCCI ajanga IPL 2023 Playoffs aser Final anogo aser tesem sangdongogo

Mumbai, Rongchii/April 21 (Agencies): Indian Premier League (IPL) 2023 playoffs aser final atema Hokulbarnü Board of Control for Cricket in India (BCCI) ajanga anogo aser tesemtem sangdongogo.

Iba asayamung playoffs aser final ya May 23 nungi May 28, 2023 tashi Chennai aser Ahmedabad nung asayatsü. Qualifier 1 ta May 23 nü MA Chidambaram Stadium nung asayatsü aser iba sülen May 24 nü Eliminator asayatsü.

Ahmedabad nung aliba Narendra Modi Stadiym nung Qualifier 2 aser IPL final May 26 aser May 28 nü asayatsü.

Qualifier 1 ya points table nung tematiba team ana tsüngta asayatsü aser Eliminator ya tasembuba aser pezübuba jenjang nung aliba team tsüngta asayatsü. Qualifier 2 nungya eliminator nung takok angur aser Qualifier 1 nung tamakok angur tsüngta asayatsü.

Ahmedabad nung Qualifier 2 asayatsü aser taoba season final asaya liasü, kong Gujarat Titans temi iba asayamung nung mezüngbuba shilem agia takok ngua liasü.

Chennai indang Chepauk nung 2019 sülen IPL playoffs mezüngbuba asayatsü.

16 buba IPL ya March 21, 2023 nü Narendra Modi Stadium nung mezüng asayaa tenzük, koba alima nung cricket asayaba tesem tulutiba lir.

2022 asayamung Mumbai aser Pune nung tesem pezü nung asaya saka playoffs aser final Kolkata aser Ahmedabad nung asaya liasü.

Taküm iba asayamung nung league ya akhi ama home aser away format nung asaya 70 asayar aser ano playoff match pezü lir. Team ter prong telok ana sedang aser team shia home aser away nung tenetben ben asayatsü, kong group kasa nungi team shia khen-khen asayatsü aser danga group nungi team ka den anaben asayatsü.

Mumbai Indians-i iba IPL asayamung ponguben koka lir, Chennai Super Kings-i pezüben koka lir. Kolkata Knight Riders ya anaben champions lir, Rajasthan Royals, Sunrisers Hyderabad aser Gujarat Titans temi khen-khen koka lir.

IPL 2023 PLAYOFFS AND FINAL SCHEDULE

Date	Match	Venue
23 May	Qualifier 1 - Team 1 vs Team 2	Chennai
24 May	Eliminator - Team 3 vs Team 4	Chennai
26 May	Qualifier 2 - Winner of Eliminator vs Loser of Qualifier 1	Ahmedabad
28 May	Final - Winner of Qualifier 1 vs Winner of Qualifier 2	Ahmedabad

Stuttgart Open: Iga Swiatek aser

Anastasia Potapova nunger quarter tongogo

Stuttgart, Rongchii/April 21 (Agencies): World number one Iga Swiatek-i Brehostibarnü Zheng Qinwen madak straight-sets agi takok nung quarter-finals tongogo.

Iba clay-court tennis asayamung nung Poland tsürlai minute 90 majungdang 6-1 aser 6-4 agi Qinwen madak takok angu.

"Asaya yimya indang bilemdangra, ni tetenzük nungi tatem tashi noklang nung noklang shilem rangloktsü nungdaka ali ama ni bilem. Ni khen anisüngzükaka tang junga asayatetba asoshi pelar," ta Swiatek-i ashi.

Set tanabuba nung Zheng-i 4-4 tongtetba sülen anaben French Open takok ngur alilai meranga asaya takok angu.

"La dak sempet lir aser ajaki aji angur," ta Swiatek-i China tsürla indang ashi.

Tesaret yiruba mechi Swiatek ya Miami Open aser Billie Jean King Cup qualifiers nung shilem magitsüsa akum.

French Open atema warm-up ama Coco Gauff asayaba mapang Anastasia Potapova-i last 16 nung tsükdaktsü.

Russia tsür Anastasia-i iba asaya amokbanga America tsürla madak 6-2, 6-3 agi takok ngua liasü.

Bodhbarnü World number six Gauff-i Russia tsür Veronika Kudermetova madak takok ngua liasü, saka Potapova den lai kasa yimya nung masayatet.

Jenjang 24 buba nung alila arishi küm 22 tain Potapova ya Stuttgart nung tang mezüngbuba asayar aser la taküm asoshi quarter-final pezü buba tongtetogo.

Wimbledon champion Elena Rybakina ya Brazil tsür Haddad Maia den last 16 asayaba mapang yirua asaya anentsüsa akum.

Iba mapang arishi küm 26 tain Haddad Maia ya Elena dang 6-1, 3-1 agi temaba nung liasü.

Kasa mapang Czech tsür taoba mapang world number one nung alila Karolina Pliskova-i Croatia tsür Donna Vekic madak 6-2, 6-7 (5/7), 7-6 (7/5) agi takok ngua quarter tongogo.

2018 küm Stuttgart takok angula Pliskova-i semi-finals asayatsü asoshi Hokulbarnü Swiatek madak takok angutsüla.

Zlatan Ibrahimovic-i Champions League medal mangutsü akok



liaka Sweden nungbai Champions League khen danga kokdanga mali. Milan ya Champions League final tongtetaka Ibrahimovic bo masayatetsü akok ta bilema pa saburtem jashiteper.

February 27 nü Serie A nung Atlanta den asayadang Milan asoshi Zlatan Ibrahimovic-i kanga junga asayatet. Iba mapang par teloki Atlanta madak goal 2-0 agi takok angu. Ajidang masü iba anogo Serie A nung Ibrahimovic ya Milan nungi asayar tambosang akum. Arishi küm 41 ser anogo 146 nung pai Alessandro Costacurta otsü melenshitsu, shiba arishi küm 41 ser anogo 25 liasü.

2020 küm tetenzüklen AC Milan-i Ibrahimovic meyipa shilang dang iba club anokshitsu. 2021 küm Serie A nung iba club tanabuba jenjang nung tembang aser iba sülen league takok marok nguteta liasü. Zlatan Ibrahimovic-i AC Milan tanaben shia arudaktsü. Pa February ita Milan indang squad-i meyiba shilangba sülen par club asaya tenet tashinung tamakok ajurua aruba tembanga liasü.

UEFA Champions League indang semi-finals nung AC Milan ya kasa yimti nungi Inter Milan den asayatsü.

Milan, Rongchii/April 21 (Agencies): UEFA Champions League quarter-final nung Serie A tetsüti Napoli madak takok anguba sülen AC Milan semi-finals tongogo.

Champions League title akoktsü asoshi Stefano Pioli'er telok ya tashi taittiba lir. Ajisüaka parnoki Champions League takok marok ngutetaka Milan nungi striker tejen Zlatan Ibrahimovic yabo Champions League winners medal mangutsü akok.

September mesüra February ita Champions League asayatsü asoshi Milan squad nung striker tejen ya inoka meliasü, kechiaser pa iba mapang ACL yiruba nungi taneptsü bushia liasü. Anungji Milan-i Europe indang champions tiben buba ngutet yonga Ibrahimovic bo iba sempet angutsü atema metemsü asütsü.

Ibrahimovic-i trophy cabinet sünga sempet balala bendena

BILEMDANGANG

"Takok anguba nisung ka masü saka jenjang aketba nisung ka asütsü merangang."